

# Serius bantu murid Orang Asli

ECERDC Terengganu guna pendekatan terbaik galak peningkatan kehadiran ke sekolah

**SUNGAI BERUA** - Majlis Pembangunan Wilayah Ekonomi Pantai Timur (ECERDC) mengorak langkah tersendiri dalam usaha membantu meningkatkan prestasi akademik murid-murid Orang Asli melalui Program Khas Orang Asli Empower ECER Latihan Akademik 2016.

Pengurus ECERDC Terengganu, Ahmad Hasim berkata, program khas yang baharu diperkenalkan tahun ini dengan kerjasama Universiti Sultan Zainal Abidin (UniSZA) itu turut menyasarkan peningkatan peratus kehadiran murid ke sekolah.

"Pendekatan digunakan juga berbeza. Kita memfokuskan modul penguasaan 3M (Membaca, Menulis dan Mengira) serta aktiviti pembelajaran menyeronokkan bagi tarik minat murid untuk hadir



Barisan hadapan: Ahmad (empat, kiri) dan Rozi (lima, kiri) bersama pengetua dan guru besar yang menerima surat penyertaan Program Empower Ecer Latihan Akademik 2016 melibatkan 10 buah sekolah di Hulu Terengganu.

ke sekolah sekali gus ikuti program yang dijalankan.

"Seramai 70 peserta termasuk 46 murid sekolah rendah dan 24 pelajar sekolah menengah di daerah Kemaman serta Hulu Terengganu terpilih menyertai program khas

yang julung kalinya dilaksanaan ini.

"Bagi daerah Hulu Terengganu, sekolah rendah yang terlibat ialah Sekolah Kebangsaan (SK) Sungai Berua di sini melibatkan 25 murid Tahun 5 dan Tahun 6, mana-

kala di Kemaman SK Sungai Pergam dengan turut membabitkan murid dari tahun yang sama.

"Program khas di SK Sungai Berua ini telah bermula sejak April tahun ini. Setakat ini, peratus kehadiran

murid memberangsangkan iaitu kira-kira 60 peratus. Kita harapkan peratusan akan meningkat dan konsisten sehingga ke akhir program pada akhir tahun ini," katanya selepas Majlis Penutup Seminar 'Move The Heart' Program Khas Orang Asli Empower Ecer Hulu Terengganu di SK Sungai Berua, di sini, kelmarin yang disempurnakan perasmiannya oleh Adun Telemong, Datuk Rozi Mamat.

Hadir sama, Pengarah Jabatan Kemajuan Orang Asli Kelantan dan Terengganu, Nik Man Nik Ya, Pengarah Pusat Pendidikan Lanjutan UniSZA, Prof Dr Ahmad Shukri Yazid serta wakil jabatan Pendidikan Negeri Terengganu dan Pejabat Pendidikan Daerah Hulu Terengganu.

Dalam perkembangan berkaitan, Ahmad berkata,

Program Empower Ecer Latihan Akademik yang diperkenalkan sejak enam tahun lalu telah berjaya membimbang 6,946 pelajar di Terengganu sehingga ini termasuk Tahun Enam, Tingkatan Tiga dan Tingkatan Lima.

Tambahnya, kumpulan sasaran program Latihan Akademik ialah pelajar dari keluarga berpendapatan rendah serta lemah dari segi prestasi akademik dan usaha itu juga bagi membangunkan pelajar lebih cemerlang akademik serta sahsiah diri.

"Sememangnya program ini adalah antara usaha strategik kerajaan melalui ECER dalam memperkasakan golongan pelajar yang berasal dari keluarga berpendapatan rendah untuk maju dan berjaya seperti mereka yang lebih bernasib baik," katanya.